

Pantang hujan, banjir kilat berlaku

KOSMO
**anda SMS
kami siasat**

HULU LANGAT - Masalah sistem perparitan yang tidak sempurna membuatkan penduduk di Jalan Nilam 1, Taman Sri Nanding, di sini, sudah jenuh membersihkan rumah setiap kali banjir kilat.

Pantang saja hujan, air busuk dari longkang di belakang rumah pasti melimpah memasuki setiap ruang rumah sehingga mereka menjadi kebal dengan situasi demikian.

Namun, sampai bila situasi tersebut harus dibiarkan tanpa pemerhatian yang sewajarnya daripada pihak berkuasa tempatan yang bertanggungjawab dalam memastikan masalah longkang tersumbat itu dapat diatasi.

Tinjauan *KOSMO!* mendapati pengaliran air longkang-longkang di situ tersekat ekoran dipenuhi dengan sampah-sarap yang tidak reput seperti bungkusan plastik



MAHAMAT menunjukkan longkang di Taman Sri Nanding, Hulu Langat yang sering tersumbat semalam.

dan sisa makanan yang datang dari gerai-gerai yang terletak tidak jauh dari situ.

Gara-gara keadaan itu,

longkang yang bersaiz kecil di perumahan itu tersekat dan menghalang air mengalir di longkang utama sejak sekian

lama.

Mahamat Tarmeze Buyong, 55, yang baru berpindah dua minggu ke situ memberitahu, kebimbangannya menyebabkan penduduk di situ tidak berani meninggalkannya rumah untuk pergi bercuti, pulang ke kampung atau sebagainya.

“Jika rumah ditinggalkan, bila balik semua barang-barang bersepah-sepah seperti dimasuki pencuri tetapi sebenarnya air sudah melimpah,” ujarnya.

Sementara itu, Hasimah Redzwan, 52, berkata, tidak pernah melihat mana-mana pihak yang bertanggungjawab datang untuk membersihkan longkang-longkang di situ.

“Aduan sudah dibuat kepada pihak berkuasa tetapi perkara itu masih berlarutan sehingga sekarang tanpa penyelesaian,” ujarnya.

Bagi Hazreena Mahamat Tarmeze, 24, pula mahu pihak bertanggungjawab menjalankan pemantauan yang lebih kerap untuk mengatasi masalah itu.